

# Powšitkowne WOZJEWJENJA

jutrońčku, 5. apryla 2026

## Kemše w rozhłosu

Serbski rozhłós wusyla džakne křižerske kemše, wutoru, 7. apryla, z Róžanta. Započatk je w 19.00 hodź.

## Literarna kofejownja

Přichodna literarna kofejownja Budyskeho ekumeniskeho tachantskeho wobchoda budže srjedu, 8. apryla, w 19.00 hodź. Rainer Kolodzie z Kamjenca čita tónraz teksty, listy a basnje Dietricha Bonhoeffera, kiž zemřě 9. apryla 1945 w koncentraciskim lěhwje Flossenbürg. Zastup je darmotny, wo dary proša. Wšitcy zajimcy su wutrobnje přeprošeni.

## Swójbne popołdnjo

Miłočanski křescansko-socialny skutk z.t. zarjaduje w Zežiwjenskim a zelowym centrumje klóštra Marijineje hwězdy w Pančicach-Kukowje swójbne popołdnjo. Wone budže srjedu, 8. apryla, wot 14.00 do 18.00 hodź. Wopytowarjo móža sej mjez druhim z cistercienskim patrom Johannesom Müllerom klóšter wotkryć, jejka debić, z přirodoškitom so zaběrać abo sej sportowe znamješko Flizzy zdobyć. Zastup płaci za džěci dwaj euraj a za staršich štyri eura.

## Emmauske pućowanje

Serbske dekanatne dušepastyrstwo přeprošuje wšitkich młodostnych na Emmauske pućowanje. Wone budže štwórtk, 9. apryla, tónraz w Sulšecach. Započatk je we 18.00 hodź.

## Dzeń wumělskeho rjemjesła w Serbskim muzeju

W Budyskim Serbskim muzeju předstaja sobotu, 11. apryla, wot 13.00 do 18.00 hodź. wosebite techniki stareho rjemjesła a ručneho džěła, kaž su to wuporjedženje plećenych stólcow, čišć z modlemi, předženje, wušiwanje abo wužrawanje jutrownych jejkow. Na wšelakich stacijach móža so wopytowarjo tež sami wuspytać. W 16.00 a 17.00 hodź. poskića tohorunja wodženje k naložkam a rjemjesłu. Wšitcy zajimcy su wutrobnje přeprošeni.

## Modlenje w Róžeńće

Na modlenje před Najswjećišim su wěriwi sobotu, 18. apryla, we 18.00 hodź. do Róžeńčanskeje hnadowneje cyrkwy přeprošeni. Pačerje budu w serbskej a němskej rěči spěwane.

## Požohnowanje motorskich

Popołdnjo z požohnowanjom motorskich zahaji so njedzelu, 19. apryla, w 14.00 hodź. z nyšporom w Ralbičanskej cyrkwi. Přizamknje so zhromadny wulět.

## Prózdnińska jězba za 4. do 8. lětnik

Na jězbu do Zhorjelca su šulerki a šulerjo nětčišeho 4. do 8. lětnika w lětnich prózdniach přeprošeni. Wona wotměje so wot pónđzele do pjatka, 3. do 7. awgusta. Swójški přinošk na wobdźělnika wučinja 130 eurow. Přizjewjenja přijimuja hač do pjatka, 1. meje, online. Link na wotpowědnu stronu je pod [www.posol.de](http://www.posol.de) wozjewjeny.

## **Oratorij „Nalěčo“**

Z wulkim orchestrom a chórom Budyskeho Serbskeho ludoweho ansambla, z chórami Budyšin, Lipa, Meja a Łužica, kaž tež ze solistami Danielu Hazec, Stefanie Hauptfleisch, Patrikom Hornákom a Clemensom Heidrichom zaklinči w jónkrótnej konstelaciji oratorij „Nalěčo“ Korle Awgusta Kocora a Handrija Zejlerja. Předstajenja su planowane pjatk, 24. apryla, w 19.30 hodź. w Budyšinje kaž tež sobotu, 25. apryla w Drježdžanach a nje-dželu, 26. apryla w Choćebuzu, a to w 17.00 hodź. Kartki předawaja mjez druhim online na internetowej stronje Serbskeho ludoweho ansambla. Link je pod [www.posol.de](http://www.posol.de) wozjewjeny.

## **Kónc tydženja k demokratiji**

Młodostni wot 14 lět kaž tež młodzi dorosceni Drježdžansko-Mišnjanskeho biskopstwa su na zhromadny kónc tydženja k demokratiji do Winfriedoweho domu w Schmiedebergu přeprošeni, a to wot pjatka do nje-džele, 24. do 26. apryla. Tak zeznajomja so mjez druhim ze wšelakimi móžnosćemi, kak móža na politiskim polu sobu rěć a kak wopačne informacije wotkrywaja. Štóž chcył so na zarjadowanju wobdźelić, měł so hač do nje-džele, 12. apryla, online přizjewić. Link k tomu nańdu zajimcy pod [www.posol.de](http://www.posol.de).

## **Pasjonske předstajenje jako film we wosom rěčach**

Wotnětka móža sej zajimcy pasionske předstajenje „Scěhuj mje!“ ze septembra 2025 jako film wobhladać. Zestajeli su jón pod nawodom Michała Cyža w studiju Lucija. Wot pjatka, 27. měrca, wječora je wón pod [www.lucija.de](http://www.lucija.de) online přistupny. Wotkaz na njón je tež pod [www.posol.de](http://www.posol.de) podaty. Kaž Michał Cyž zdźěli, předleži film we wosom rěčach: serbsce, němsce, jendželsce, španisce, francosce, italsce, česce a pólsce. Štóž ma swój ličak na němsku rěč nastajeny, měł sej serbsku wersiju wupytać, zo by film w originalnej rěči pasionskeho předstajenja scěhować móhl. Němski přeložk je po tym přewzaty, kaž su jón rěčnicy za němskich hosći w Chróscicach w rolach přednjesli. Tamne přeložki su syntetisce produkowane, tež z pomocu kumštneje inteligency. Tak su to wopytowarjo kongresa Europasion loni srjedź septembra w Chróscicach tohorunja slyšeli.

## **Zawod do tematiki lětušich nabožnych prózdniskich dnjow**

Drježdžansko-Mišnjanske biskopstwo poskičuje tež lětsa zaso zawod do tematiki nabožnych prózdniskich dnjow. Prěnje tajke zarjadowanje budže pónđzela, 11. meje, wot 18.00 do 21.00 hodź. na Budyskej farje. Dalše je mjez druhim srjedu, 27. meje, w Drježdžanach planowane. Zdobom poskića zamołwići zawod tež online přez platformu Zoom, a to štwórtk, 28. meje, wot 18.00 do 21.00 hodź. Přizjewjenja přijimuju online. Link k tomu kaž tež k dalšim informacijam je pod [www.posol.de](http://www.posol.de) podaty.

## **Wukublanje na měšnika**

Mužojo, kotřiž chcedža teologiju studować a so z měšnikom stać, móža so wot nazymy we wobłuku studija na to přihotować. Tež mužojo bjez matury, ale z wotzamknjenym powołanskim wukublanjom móža so na puć měšnistwa podać. Do požadanja wotměja so w biskopskim ordinariaće w Drježdžanach orientaciske rozmołwy, za kotrež měli so zajimowani mužojo w personalnym wotrjedže přizjewić. Požadanja za wukublanje su tam hač do pjatka, 17. apryla, móžne. Link k nadrobnišim informacijam a požadanskim podložkam je pod [www.posol.de](http://www.posol.de) podaty.

## **Wukubłanje na stajneho diakona w ciwilnym powołanju**

Lětsa nazymu zahaja na Fachowej akademiji za wosadnu pastoralku w Magdeburgu nowy wukubłanski kurs za muži, kotřiž chcyli so ze stajnym diakonom w ciwilnym powołanju stać. Wukubłanje absolwować móže kóždy, kiž ma mjez druhim wotzamknjene wukubłanje powołanja kaž tež teologiskeho dalokokursa „Křesćanska wěra: zakładny kurs“ Domoweje šule we Würzburgu, je fyzisce a psychisce počezomny a je kmany a zwólniwy so z nuzu druhich rozestajeć. Zajimcy měli při zahajenju wukubłanja znajmjeńša 35 lět być a nic starši hač 50 lět. Woni móža so w personalnym wotrjedže biskopskeho ordinariata w Drježdžanach za orientacisku rozmołwu přizjewić. Po tym budže rozsudžene, hač so požadanski proces zahaji. Požadanja přijimuju tam hač do pjatka, 17. apryla. Link k nadrobnišim informacijam a požadanskim podložkam je pod [www.posol.de](http://www.posol.de) wozjewjeny.

## **Wukubłanje za pastoralnu službu we wosadže**

Zajimcy, kotřiž chcyli pastoralnu službu we wosadže wukonjeć, móža lětsa nazymu wukubłanje na wosadneho referenta zahajić. Žony a mužojo, kiž tak mnohostronske služby a charismy wěriwych podpěraja a spěchuja, móža so ze studijom nabožneje pedagogiki respektiwne teologije a nawjazowaceho třilětneho wukubłanja za tajku službu kwalifikować. Zajimowane wosoby měli so na personalny wotrjad biskopskeho ordinariata w Drježdžanach wobroćić, hdžež wotměje so do móžneho požadanskeho procesa orientaciska rozmołwa. Požadanja přijimuju tam hač do pjatka, 17. apryla. Dalše informacije nańdu zajimcy pod [www.posol.de](http://www.posol.de).